

周

禮

正

義

周禮正義卷六十三

瑞安孫詒讓學

職方氏掌天下之圖以掌天下之地辨其邦國都鄙四夷八蠻  
七閩九貉五戎六狄之人民與其財用九穀六畜之數要周知  
其利害天下之圖如今司空輿地圖也鄭司農云東方曰夷南  
方曰蠻西方曰戎北方曰獯狄玄謂閭蠻之別也國語曰閭芊  
蠻矣四八七九五六周之所服國數也財用泉穀貨賄也利金  
錫竹箭之屬害神姦鑄鼎所象百物也爾雅曰九夷八蠻六戎  
五狄謂之四海疏掌天下之圖以掌天下之地者此與司會大  
司徒爲官聯也周書職方篇與此職文同彼敘云王化雖弛天  
命方永四夷八蠻攸尊王政作職方孔疏云此在周官大司馬

下篇穆王使有司鈔出之欲時省焉案周書職方次史記篇之  
後史記爲穆王時書故敘注並彖彼爲說然今本周書般模未  
必周史官之舊次敘亦似後人所補作孔晁強爲之說不足據  
僞孔安國尚書敘云孔子述職方以除九丘又以此經爲孔子  
所述尤妄說也云辨其邦國都鄙四夷八蠻七閩九貉五戎六  
狄之人民者此職辨字周書及漢書地理志敘並作辯同聲假  
借字自邦國都鄙以及四海並辨其人民之數則又掌天下之  
版輿上圖互相備也此官職掌通於天下經舉諸侯邦國及采  
地都鄙而不及國中鄉遂公邑等者舉外以該內亦辨之可知  
云與其財用九穀六畜之數要者亦著之於版也小宰注云要  
會謂計最之簿書周書無要字疑脫九穀詳大宰疏 注云天

下之圖如今司空輿地圖也者此卽大司徒所建邦之土地之圖彼注亦云若今司空郡國輿地圖案此注不言郡國者文省賈疏謂此職方兼主夷狄漢夷狄不置郡國故不言非也鄭司農云東方曰夷南方曰蠻西方曰戎北方曰貉狄者職方孔注義同說文大部云夷平也東方之人也虫部云蠻南蠻蛇種犬部云狄北狄犬種狄之言淫辟也豸部云貉北方豸種也孔子曰貉之爲言惡也王制云東方曰夷被髮文身有不火食者矣南方曰蠻雕題交趾有不火食者矣西方曰戎被髮衣皮有不粒食者矣北方曰狄衣羽毛穴居有不粒食者矣大戴禮記千乘篇云東辟之民曰夷精以僥南辟之民曰蠻信以朴西辟之民曰戎勁以剛北辟之民曰狄肥以戾案諸書言四裔者皆

不及貉秋官敘官貉隸注云東北夷職方孔注云貉狄之別字俗作貉詩大雅韓奕篇其追其貉毛傳云追貉戎狄國也毛孔亦以貉狄爲一漢書高帝紀北貉顏注云貉在東北方三韓之屬皆貉類也又揚雄傳注引郭璞云今扶餘國卽濊貉故地後漢書東夷傳云句驪一名貉耳案貉卽今朝鮮國地此經四夷夷蠻戎狄外更有閩貉貉者東北夷也閩者東南夷也貉雖與狄同屬北方而實爲狄之別猶之閩雖與蠻同屬南方而實爲蠻之別也先鄭此注以貉爲北狄孟子告子篇趙注云貉在北方賈疏引鄭志及書敘僞孔傳並以爲東夷說文豸部云貉北方而羊部又云東方貉並偏舉一方不及貉隸後鄭注之析矣又夷蠻戎狄四者散文亦通故秋官蠻閩夷貉四隸司隸通謂

之四翟之隸翟與狄同師氏又謂之四夷之隸是也云立謂閩  
蠻之別也者職方孔注同說文虫部云閩東南越蛇種山海經  
海內南經云甌在海中郭注云閩越卽西甌今建安郡是也亦  
在岐海中文選吳都賦劉逵注云閩越名也秦并天下以其地  
爲閩中郡案閩卽今福建在周爲南蠻之別也引國語曰閩芊  
蠻矣者證閩爲蠻之別釋文云芊李云今周禮本或無此字國  
語則有案韋本國語閩作蠻賈疏云案鄭語史伯曰蠻芊蠻矣  
注云謂上言叔熊避難於濮蠻隨其俗如蠻人也故曰蠻彼不  
作閩者彼蓋後人轉寫者誤鄭立以閩爲正叔熊居濮如蠻後  
子從分爲七種故謂之七閩也案賈卿彙括韋義攷鄭語又云  
芊姓夔越閩爲東南越或亦出於芊姓但賈以閩爲叔熊之後

則古書無徵鄭韋所據文義並殊賈強爲傳合恐不塙也云四  
八七九五六周之所服國數也者卽大行人云九州之外謂之  
蕃國也職方孔注云八七九五六見非一之言也案孔晁不言  
四者蓋以四夷爲總目蠻閩貉戎狄之言非東方之夷也賈疏  
云鄭志趙商問職方氏掌四夷八蠻七閩九貉五戎六狄之數  
注云周之所服國數禮記明堂位曰周公六年制禮作樂朝諸  
侯於明堂有朝位服事之國數夷九蠻八戎六狄五禮文事異  
未達其數鄭荅職方氏四夷四方夷狄也九貉卽九夷在東方  
八蠻在南方閩其別也戎狄之數或六或五兩文異爾雅惟有  
其數耳皆無別國之名校不甚明故不定若然爾雅之數與明  
堂同皆數耳無別國之名今五六者正是數耳其有鄭不甚明

之未知何者是是亦不著其錯誤案賈引鄭志說卽孔晁所本  
然鄭彼說以釋師氏四夷之隸及鞮鞻氏四夷之樂則正相當  
若此注以四八七九五六並舉爲所服國數又無破先鄭之說  
則不以四夷爲四方夷之總目象胥云掌蠻夷閩貉戎狄之國  
夷在蠻下則非總目之文可知依經攷義此注爲長孔賈反依  
鄭志改此注義愼矣大戴禮記用兵篇云六蠻四夷盧注云周  
禮職方氏四夷八蠻七閩九貉五戎六狄此周所服四海其種  
落之數也明堂位曰九夷八蠻六戎五狄此朝明堂時來者國  
數也爾雅曰九夷八狄七戎六蠻其夏之所服與殷之夷國東  
方十南方六西方九北方十有三然鄭立以四夷爲四方九貉  
爲九夷又引爾雅其數不同及六四文闕而不定是終使學者



疑於所聞也。盧氏亦不從鄭志說。其二云周所服種落之數正依此注義。惟云爾雅爲夏制則無據。據又疑鄭引爾雅文數不同亦非也。詳後云財用泉穀貨賄也者。大宰注云財泉穀也。又宰夫注云用貨賄也。故此兼釋之云利金錫竹箭之屬者。據下文云害神姦鑄鼎所象百物也者。左宣三年傳王孫滿對楚子云夏之方有德遠方圖物貢金九牧鑄鼎象物百物而爲之。備使民知神姦。杜注云圖鬼神百物之形使民逆備之。是神姦謂鬼神百物也。引爾雅曰九夷八蠻六戎五狄謂之四海者。釋地文今郭注本作九夷八狄七戎六蠻謂之四海。毛詩小雅蓼蕭序箋同。孔疏云雅師謀我應注皆與此同。職方氏及布憲注亦引爾雅云九夷八蠻六戎五狄謂之四海。數既不同而俱云爾雅

則爾雅本有兩文今李巡成注謂之四海之下更三句云八蠻  
在南方六戎在西方五狄在北方此三句唯李巡有之孫炎郭  
璞諸本皆無也李巡與鄭同時鄭讀爾雅蓋與巡同故或取上  
文或取下文也此及中候直言四海不列其數故引上文解之  
職方列其國數唯五戎六狄與爾雅六戎五狄上下不同餘則  
相似故據下文也布憲則秋官承夏官之下故同於職方焉周  
禮注據爾雅下文八蠻六戎五狄當四海者以明堂位陳周公朝  
於明堂之時其數與之等是周時之驗故據之焉案據孔說則  
鄭所見釋地本有兩文故此注及布憲注並錯引其語調人注  
亦同至蓼蕭序箋及尚書中候注則又專據釋地上文爲說箋  
注雖異要同本釋地廬辯及賈疏未知爾雅李郭本異妄有所

疑賈又謂詩箋或後人轉寫之誤疏矣白虎通義禮樂篇云東方爲九夷南方爲八蠻西方爲六戎北方爲五狄故曾子問曰九夷八蠻六戎五狄百姓之難至者也班所引曾子問佚文亦與此注及明堂位同墨子節葬下篇又有八狄七戎則與釋地郭本同又王制孔疏釋九夷八蠻六戎五狄之名九夷依東夷傳九種曰畎夷于夷方夷黃夷白夷赤夷玄夷風夷陽夷李巡注爾雅云一日玄菟二曰樂浪三曰高驪四曰滿飾五日鳧夷大曰索家七曰東屠八曰倭人九曰天鄙八蠻云一日天竺二曰咳首三曰僬僥四曰跂踵五曰窮胃六曰僭耳七曰狗軼八曰旁春六戎云一日僥夷二曰戎夷三曰老白四曰耆羌五曰鼻息六曰天剛五狄云一日月支二曰穢貊三曰匈奴四曰單

千五曰白屋論語子罕皇疏說與李略同今案夷蠻諸國經記並約舉大數文多錯異鄭君精博猶未聞其別國之名李范之說未知所據附錄之以備攷乃辨九州之國使同貫利貫事也疏乃辨九州之國者說文川部云州水中可居曰州昔堯遭洪水民居水中高土故曰九州一日州疇也各疇其土而生之尙書釋文引春秋說題辭云州之言殊也注云貫事也者爾雅釋

詁文職方孔注亦同賈疏云使同其事利不失其所也東南曰揚州其山鎮曰會稽其澤藪曰具區其川三江其浸五湖其利金錫竹箭其民二男五女其畜宜鳥獸其穀宜稻鎮名山安地德者也會稽在山陰大澤曰藪具區五湖在吳南浸可以爲陂灌溉者錫鐵也箭篠也鳥獸孔雀鸞鳩鵠犀象之屬故書箭爲

晉杜子春云晉當爲箭書亦或爲箭疏東南曰揚州者沿禹貢  
制也阮元云廣韻二十一震太平御覽州郡部皆引作揚州蓋  
州名字本從木自開成石經定從手旁後俱作揚詒讓案揚州  
字古書揚揚錯出宋景祐本漢書地理志述此經並作楊宋本  
爾雅釋地同許嵩建康實錄引春秋元命苞云地多赤楊因取  
名焉則當以楊爲正釋名釋州國云揚州州界多水水波揚也  
禹貢孔疏引李通云江南其氣燥勁厥性輕揚故曰揚揚輕也  
爾雅釋文引太康地記云以揚州漸太陽位天氣奮揚履正含  
文明故取名焉此並依揚字爲釋張參五經文字據李通輕揚  
之訓所從木爲俗譌故唐石經書禮爾雅皆從手宋以來版本  
多沿之宋小字本明閩監本周禮作楊者蓋誤而合於古非所

據舊本如是也至九州名義大抵就州中所屬山川國邑爲稱諸家望文生義似皆未埒竊謂此州地苞百越揚越聲轉義亦同揚州當因揚越得名猶荊州之與荆楚義亦相因矣禹貢云淮海惟揚州公羊莊十年徐疏引鄭書注云揚州界自淮而南至海以東也爾雅釋地云江南曰揚州郭注云自江南至海呂氏春秋有始覽云東南爲揚州越也胡渭云殷割淮南江北之地以益徐故爾雅曰江南曰揚州蓋視夏之揚爲小然其西又得禹貢荊州之地案禹貢導水文漢至大別入江而爾雅曰漢南曰荊州蓋漢水之名至大別山而止其曰漢南者謂大別以西漢水之南也曰江南者謂大別以東江水之南也荆揚之界當於此分朱右曾云禹貢揚州北至淮東至海爾雅言殷制九

州江南曰揚則北不得淮周以淮爲青州浸疑同於殷案胡朱說近是殷以淮隸徐周省徐入青故淮亦隨之蓋並沿殷制也周揚州方域東至海南接越閭荒服不知所極西依胡渭說抵漢與荆界北逾江與青界東南東北並至海西南接南越荒服不知所極西北距淮與豫界此經九州名多因虞夏殷制而疆域則不甚同今略舉四至八到以備攷證其詳未能究也云其川三江者賈疏云案禹貢云九江今在廬江尋陽南皆東合爲大江揚州所以得有三江者江至尋陽南合爲一東行至揚州入彭蠡復分爲三道而入海故得有三江也詒讓案三江者北江中江南江也書禹貢揚州云三江既入震澤底定孔疏引鄭書注云三江分於彭蠡爲三孔東入海又導漢云東匯澤爲彭

蠡東爲北江入于海又導江云東迤北會于匯東爲中江入于海疏引鄭注云東迤者爲南江此經義與禹貢同漢書地理志云蜀郡湔氐道禹貢嶧山在西徼外江水所出東南至江都入海又會稽郡吳南江在南東入海揚州川毗陵北江在北東入海揚州川又丹陽郡石城分江水首受江東至餘姚入海蕪湖中江出西南東至陽羨入海揚州川卽通釋禹貢及此經三江之義東漢人說三江者論衡書虛篇云有丹徒大江有錢塘浙江有吳通陵江水經禹貢山水澤地所在篇云中江在丹陽蕪湖縣西南東至會稽陽羨入于海北江在毘陵北界東入于海又沔水篇云沔水與江合流又東過彭蠡澤又東至石城縣分爲二其一東北流其一又過毗陵縣北爲大江又東至會稽餘



姚縣東入于海案水經此文難通酈注亦疑其誤戴震校本謂當云其一東北流又過毗陵縣北爲北江其一又東至會稽餘姚縣東入于海依戴校則水經說與漢志三江分江水說正同又酈注云地理志曰江水自石城東出逕吳國南爲南江江水東逕石城縣北又東逕宣城之臨城縣南又東逕安吳縣又東逕寧國縣南又東逕故鄣縣南安吉縣北又東北爲長瀆麻湖口又麻烏程縣南通餘杭縣則與浙江合又東逕餘姚故城南又東注于海依酈說是漢志石城下之分江水卽吳南之南江亦一記其原一詳其委也金榜中三江鄭義云禹貢經文凡言東南北者皆指其下流水所趨之地經言東爲北江東爲中江明在彭蠡東經言爲北江入于海爲中江入于海明皆專流逕

達非渾濤入海者故注云江至彭蠡分爲三孔入于海蓋據經立訓如此漢自北入江故分爲北江者仍繫於漢岷江在中故分爲中江者仍繫於江南江不見於經彭蠡以下首受江者是也故注云東迤者爲南江言東迤北會于匯即東出爲南江矣此鄭君之說賈氏疏職方三江顏氏注地理志北江中江皆本其義者也孔傳于東爲北江入于海注云自彭蠡江分爲三入震澤遂爲北江而入海言三江入震澤與經北江中江入于海不合言入震澤遂爲北江與經匯澤爲彭蠡東爲北江不合晉顧夷撰吳地記云松江東北行七十里得三江口東北入海爲婁江東南入海爲東江並松江爲三江此卽吳越春秋所云出三江之口者孔傳爲魏晉閒書遂援以釋禹貢三江遺失經意又

申班酈義云班志毗陵之北江卽今大江其蕪湖之中江吳縣之南江逕流湮廢据班志丹陽石城下云分江水首受江東至餘姚入海說文江水至會稽山陰爲浙江開闢十三州志江水至會稽與浙江合晉灼亦云水經注謂地理志江水自石城東出逕吳國南爲南江榜謂分江水合三江言之爲南江猶岷江合言之爲北江班志于石城著南江源委猶于蒯氏道著北江源委故志于中江言出蕪湖西南東至陽羨入海至南江北江但云東入海以入海之地已互見于石城蒯氏道也漢烏程地在震澤之南東北與吳縣壤接志言震澤在吳西則南江至烏程者爲在吳南矣水經閩中江不著酈元敘南江麻湖口因釋湖口地名云江南東注于具區謂之五湖口東則松江出焉按郭景

純江賦注五湖以漫漭爲證爲中江入海之蹟然于出蕪湖東至陽羨者究莫能綜緝所纏蓋中江徙流久矣北江爲岷江經流由毗陵入海中江出蕪湖由松江入海南江出石城合浙江入海故子胥云吳之與越三江環之班志所敘三江如是水經沔水注引郭景純亦云三江岷江松江浙江蓋診其歸墟之蹟而未極中江南江之源者也錢塘孫星衍阮元說並略同今案三江之說以漢志最爲近古可信蓋江水自彭蠡以西止有經流獨行至彭蠡以東乃分爲三以今水道校之江水自四川松潘廳羊膊嶺發源過四川湖南湖北江西安徽經江蘇揚州府江都縣常州府武進江陰兩縣卽漢毗陵縣境至通州入海此卽漢志之北江也志於蒯氏道箸其源於毗陵詳其委迄今二

千年經流無改亦向無異說而中江南江則說多舛異蓋漢志謂中江出蕪湖至陽羨入海其逕流無可校驗水經江水篇今本有關佚故中江下流亦無見文王象之輿地紀勝云水經云中江在丹陽蕪湖縣東南至會稽陽羨入海今縣河東達黃池入三湖至銀林止所謂中江東至陽羨卽此是也蘇常承此江下流常病漂沒後築銀林五堰以窒之自是中江不復東而宜歛諸水皆由蕪湖西達大江矣又文選江賦李注引水經注云中江東南左會涇湖又引風土記謂涇湖在陽羨此與漢志亦正合金氏阮氏推校眾說謂中江卽今安徽太平府蕪湖縣南之蕪湖水古蓋本通江蘇常州府宜興縣之荆谿故樂史太平寰宇記江南東道常州宜興縣下云荆谿漢志中江卽此谿也

今宜興卽漢陽羨縣地惟蕪湖水自唐宋時築銀林五堰中江故流遂斷不復東又荆谿東注太湖亦不逕入海並與漢時異其下流則顧炎武胡渭阮元並謂卽今之松江東爲吳淞江由上海縣入海者與金說略同陳澧則謂中江蓋自今荆谿入太湖又東爲長涇白湖東流至常熟縣入海今攷蕪湖水及荆谿爲中江遺迹殆無疑義惟入海下流尙無塙證南江依酈說則當由今安徽池州貴池縣西分出一派其下流蓋入太湖出爲今江蘇蘇州府吳江縣運河卽漢吳縣境也又南流至今浙江紹興府山陰縣爲浙江說文水部浙字注所云江水東至會稽山陰爲浙江者也其下流又至今紹興府餘姚縣入海水經浙水篇注載南江自石城至餘姚入海之蹟文尙完備今貴池分

江之處故瀆久湮吳江運河與浙江又不相屬故酈說亦無可  
案驗金氏阮氏並據酈說以證班志顧炎武胡渭錢大昕洪亮  
吉說並同但漢志南江本云從吳南入海而分江水自從餘姚  
入海二文本不同吳與餘姚南北相距殊遠中尙隔由拳海鹽  
諸縣似不可并爲一況漢志分江水下並不云揚州川水經江  
水下流今本文旣譌酈氏泐水注又多疏謬所說或未必合  
班氏之指故程瑤田全祖望戴震錢坫陳澧並謂分江水非卽  
南江其說似不可通川流湮徙舊籍紛互難以決定謹備列眾  
說用資摭覈至漢晉以來說三江者異說甚多國語越語韋注  
云三江松江錢塘江浦陽江水經泐水注云松江自太湖東北  
流逕七十里江水奇分謂之三江口吳越春秋稱范蠡去越乘

舟出三江之口入五湖之中者也此亦別爲三江五湖雖稱相  
亂不與職方同庾仲初揚都賦注云今太湖東注爲松江下七  
十里有水口分流東北入海爲婁江東南入海爲東江與松江  
而三此非禹貢之三江也今案庾說與禹貢釋文引吳地記同  
史記夏本紀張氏正義亦從其說此別爲太湖以下之三江酈  
道元謂非禹貢職方之三江禹貢疏亦云職方揚州其川曰三  
江宜舉州內大川其松江等雖出震澤入海旣近周禮不應舍  
岷山大江之名而記松江等小江之說是也吳越春秋則以浙  
江浦陽江剡江爲三江是又專就浙東之水言之並與書禮無  
會又徐堅初學記地部縵括孔鄭書注三江義云左合漢爲北  
江會彭蠡爲南江岷江居其中此謂三江之分在彭蠡以上與



禹貢疏所引三江分於彭蠡爲三孔入海者義甚疑徐氏之誤  
實非鄭注也史記正義引括地志云禹貢三江俱會於彭蠡合  
爲一江入于海此說與徐引鄭說略同並顯與經違不可依據  
唐宋以後眾說紛異尤甚今悉無取焉云其浸五湖者釋文云  
浸本又作寢漢書地理志述此經亦作寢顏注云寢古浸字也  
案說文水部無浸字寢下云寢水出魏都武安東北入呼沱水  
是寢本水名段借爲陂寢此經作浸漢志作寢者並寢之省也  
云其利金錫竹箭者此經九州所述山澤川浸之次復列其利  
以下卽上所辨人民財用九穀六畜之數要也云其民二男五  
女者職方孔注云九州土氣生民男女各不同案此經揚荊豫  
兗幽并六州皆女多於男雍冀二州則男多於女淮南子墜形

訓云山氣多男澤氣多女是也云其畜宜鳥獸者周書職方作其畜宜雞狗鳥獸於文爲贅蓋誤衍云其穀宜稻者淮南子墜形訓云江水肥仁而宜稻與此經揚荆宜稻亦合易泰詩周南樛木孔疏引此經並云荊州揚州宜稻麥今本兩州並無麥周書職方漢地理志敘並同疑孔穎達偶誤記也 注云鎮名山

安地德者也者廣雅釋詁云鎮安也大司樂四鎮注云四鎮山之重大者書舜典封十有二山僞孔傳云每州之名山殊大者以爲其州之鎮此九州九山亦並當州重大之山以鎮安地域者故尊之曰鎮也云會稽在山陰者漢地理志云會稽郡山陰會稽山在南上有禹冢禹井揚州山案今浙江紹興府山陰縣卽漢故縣會稽山在東南十二里云大澤曰藪者說文艸部云

藪大澤也風俗通義山澤篇云謹案爾雅藪者澤也藪之爲言厚也草木魚鼈所以厚養人君與百姓也案今爾雅無此文賈疏云案澤虞職大澤大藪注水鍾曰澤水希曰藪則澤藪別矣但澤藪相因亦爲一物故云大澤曰藪也云具區五湖在吳南者爾雅釋地十藪吳越之間有具區郭注云今吳縣南太湖卽震澤是也漢書地理志云會稽郡吳故國周大伯所邑具區澤在西揚州藪古文以爲震澤風俗通義山澤篇云九藪揚州曰具區在吳縣之西賈疏云依地理志南江在吳南震澤在西通而言之亦得在吳南具區卽震澤一也詒讓案山海經南山經云浮玉之山北望具區郭注云今吳縣西南太湖也禹貢震澤底定僞孔傳云震澤吳南大湖名孔疏云案周禮職方揚州藪

曰具區浸曰五湖五湖卽震澤若如志云具區卽震澤則浸藪爲一案餘州浸藪皆異而揚州同者蓋揚州浸藪同處論其水謂之浸指其澤謂之藪胡渭云具區班固以爲卽震澤蓋澤自吳西南境東出爲松江一名笠澤在今吳江縣界北去吳五十里水經注云笠澤在吳南松江在右國語越伐吳吳禦之笠澤越軍江北吳軍江南者是也朱葉夢得避暑錄語云孔氏以太湖爲震澤非是周官揚州澤藪爲具區其浸爲五湖旣以具區爲澤藪則震澤卽具區也太湖乃五湖之總名耳凡言藪者皆人資以爲利故曰藪以富得民而浸則但水之所鍾也今平望八尺震澤之間水瀾漫而極淺與太湖相接而非太湖自是入於太湖自太湖入於海雖淺而瀾漫故積潦暴至無以洩之則

溢而害田所以謂之震猶言三川皆震者然蒲魚蓮芡之利人所資者甚廣亦或可隄而爲田與太湖異所以謂之澤藪黃儀云今土人自包山以西謂之西太湖水始淵深自莫釐武山以東謂之南湖水極灘淺蓋卽古之震澤止以上流相通後人遂混謂之太湖誤矣案胡黃說是也具區者太湖旁水希之地故謂之藪亦謂之震澤五湖始爲太湖書僞孔傳及郭璞孔穎達鄭道元諸人並淆提其辨鄭此注則以其同在吳南故牽連釋之非謂二者爲一也國語越語云越興師伐吳戰於五湖韋注云五湖今太湖方言郭注義同文選江賦李注引張勃吳錄云五湖者太湖之別名也周行五百餘里說文水部云湖大陂也揚州浸有五湖案今江南蘇州府吳縣卽漢故縣太湖在西南

三十里至五湖枝別之名秦漢古書無文吳晉以後異說殊夥如水經沔水注云南江東注于具區謂之五湖口五湖謂長蕩湖太湖射湖貴湖滬湖也又云范蠡滅吳返至五湖而辭越斯乃太湖之兼攝通稱也虞翻曰是湖有五道故曰五湖又史記夏本紀正義云五湖者菱湖游湖莫湖貢湖胥湖皆太湖東岸五灣爲五湖蓋古時應別今並相連范成大吳郡志引吳地記說同太平寰宇記江南東道湖州引韋昭三吳郡國志云太湖邊有游湖莫湖胥湖貢湖就太湖爲五湖又云胥湖蠡湖洮湖滬湖就太湖爲五也又引虞仲翔川瀆記云太湖東通常州松江南通烏程霅溪水西通義興荆溪水北通晉陵滬湖東通嘉興苕溪水凡五通謂之五湖後漢書馮衍傳李注云滬湖洮

周禮正義

禮六十三

十五 楚學社本

五百四十八

湖射湖貴湖及太湖爲五湖並太湖之小支俱連大湖故太湖兼得五湖之名諸書所說五湖名各殊異不知孰爲周秦舊名攷韓非子初見秦篇說秦破荆襲郢取洞庭五湖則楚南別有五湖與揚浸殊異若史記河渠書索隱又引郭璞江賦以五湖爲具區洮滬彭蠡青草洞庭今檢郭賦並不以此爲五湖況青草洞庭遠在荆域尤與揚浸違悟洮滬亦本二湖而并爲一其說殊謬不足據也云浸可以爲陂灌溉者者漢地理志顏注云川水之通流者也浸謂引以灌溉者案說文水部湖下云浸川澤所仰以灌溉也月令鄭注云畜水曰陂蓋大川源流縣遠迴注無定浸則儲蓄一方利資灌溉小於川者也毛詩小雅瞻彼洛矣傳以洛爲宗周漑浸水卽據後雍浸之洛言與鄭許義同

云錫鐵也者爾雅釋器云錫謂之釧郭注云白鐵急就篇顏注云錫在銀鉛之間卽今白鐵也禹貢揚州厥貢惟金三品又有錫貢孔疏引鄭書注以爲銅三色又云錫所以柔金也考工記總敘亦云吳粵之金錫金錫並卽謂銅鐵不兼它金也僞孔傳及詩魯頌泮水孔疏引王肅說金三品爲金銀銅與鄭異云箭篠也者周書孔注同說文竹部云箭矢也篠箭屬小竹也篠卽篠之俗爾雅釋艸云篠箭書禹貢揚州云篠簜旣敷孔傳云篠竹箭簜大竹水去已布生爾雅釋地云東南之美者有會稽之竹箭焉郭注云竹箭篠也戴凱之竹譜云箭竹高者不過一丈節間三尺堅勁中矢江南諸山皆有之會稽所生最精好據此諸文是箭一名篠卽竹之小而疏節堅中者也云鳥獸孔雀鸞



周禮正義

禮六十三

十六卷

五百四十八

鵠鵠犀象之屬者別於家畜也職方孔注云鳥獸山澤所育之屬也御覽羽族部引劉欣期交州記云孔雀色青尾長六七尺能舒舞足爲節出嶺南諸處說文鳥部云鸞赤神靈之精也赤色五采雜形鳴中五音頌聲作則至周武王時氏羌獻鸞鳥爾雅釋鳥云鵠鵠犀詳函人疏象詳壺涿氏疏此並南徼珍異鳥獸故鄭約舉之云故書箭爲晉杜子春云晉當爲箭書亦或爲箭者云舊本並誤曰今據明葛肅本正段玉裁云大射儀綴諸箭鄭注古文箭爲晉與此故書同二字古同音也吳越春秋晉竹十度晉竹正謂箭竹所謂會稽竹箭也箭矢竹也本小竹之名中矢因名矢爲箭說文本部田楷木也從木晉聲書曰竹箭如楷案此當云周禮曰竹楷讀如箭今本轉寫譌亂也許所

見周禮故書字從木案段說近是正南曰荊州其山鎮曰衡山  
其澤藪曰雲瞢其川江漢其浸潁湛其利丹銀齒革其民一男  
二女其畜宜鳥獸其穀宜稻衡山在湖南雲瞢在華容潁出陽  
城宜屬豫州在此非也湛未聞齒象齒也革犀兕革也杜子春  
云湛讀當爲人名湛之湛湛或爲淮疏正南曰荊州者沿禹貢  
制也釋名釋州國云荊州取名於荆山也必取荆爲名者荆警  
也南蠻數爲寇逆其民有道後服無道先彊常警備之也禹貢  
孔疏引李巡云荊州其氣燥剛稟性彊梁故曰荊荆彊也案劉  
氏謂荊州取名於荆山是也禹貢荆及衡揚惟荊州公羊莊十  
年傳徐疏引鄭書注云荊州界自荆山南至衡山之南爾雅釋  
地云漢南曰荊州郭注云自漢南至衡山之陽呂氏春秋有始

周禮正義

禮六十三

七 楚學社本

五百四十八

覽云南方爲荊州楚也案周荊州方域東依胡渭說盡漢與揚  
界南逾衡山接南夷西距巴蜀並荒服不知所極北據荊山與  
豫界東南與揚界不知所分東北抵漢東與豫界西南接西南  
夷荒服不知所極西北距漢與雍界云其澤藪曰雲菅者舊周  
書作夢同詳後云其川江漢者賈疏云揚州云二江不言漢此  
荊州直言江不言二兼云漢者此州江未分爲二故直云江此  
州有漢水過焉故江漢並言也詒讓案江卽揚州三江之上流  
詳前疏漢者禹貢云嶓冢導漾東流爲漢又東爲滄浪之水過  
三澨至於大別南入于江說文水部云漢漾也東爲滄浪水漾  
水出隴西氐道東至武都爲漢沔水出武都沮縣東浪谷東南  
入江或曰入夏水漢地理志云隴西郡氐道禹貢養水所出至

武都爲漢又武都郡沮沮水出東狼谷南至沙羨南入江荊州  
川又武都東漢水受氐道水一名沔過江夏謂之夏水入江又  
隴西郡西禹貢嶓冢山西漢水所出南入廣漢白水東南至江  
州入江又南郡華容夏水首受江東入沔水經沔水篇云沔水  
出武都沮縣東狼谷中至江夏沙羨縣北南入於江又漾水篇  
戴震校本云漾水出隴西氐道縣嶓冢山東至武都沮縣爲漢  
水過江州縣東南入于江金榜云後儒言漢水源者咸求之  
于嶓冢以漢志考之嶓冢導漾惟據禹貢漢水言耳周職方荆  
州漢水則不導源于嶓冢故志言沮水出沮縣東狼谷南至沙  
羨南入江荊州川說文水經後漢郡國志皆云然蓋漾水輟流  
不與漢水相屬由來久矣志言禹貢漾水出隴西氐道縣至武

都爲東漢水一名沔過江夏謂之夏水入江此明禹貢漢水故  
道班氏自謂宋獲舊聞考跡詩書推表山川以綴禹貢周官春  
秋下及戰國秦漢者如是非謂漢代逕流之道東漢水仍上受  
氐道水也水經言潏水出隴西氐道縣嶠冢山東至武都沮縣  
爲漢水東南至江州縣東南入于江潏水既輟東流勢必西入  
徒以氐道無可考見後世莫能定其孰爲潏水而與東漢水不  
相屬得水經校之益明後儒考漢志不詳于漢源求嶠冢不得  
因旁漢水之山強名之爲嶠冢亦近誣矣漢志禹貢嶠冢山在  
隴西西縣西漢水所出南入廣漢白水東南至江州入江不見  
于氐道然于氐道言禹貢潏水所出東至武都爲漢正釋經嶠  
冢導潏東流爲漢明氐道亦得有嶠冢山是山峰岫延長西氐

道皆其盤迴之地準之地望氏道當在西縣東志已於西縣著  
嶠冢山氏道例不重出水經言漾水出隴西氏道嶠冢山郭景  
純山海經注亦言嶠冢在武都氏道縣南可與漢志互明西漢  
水鄭書注以爲禹貢梁州之潛以上受漢別故得西漢水之稱  
後乃併其上滌出嶠冢者名之爲西漢水矣案金說是也漢有  
五名初出自嶠冢爲漾漾字又作養至武都爲漢對西漢水言  
之則曰東漢水漢時漾水之源已絕遂以近源之沮水當漢水  
沮又名沔水過江夏又謂之夏水實一川也惟西漢水出西縣  
嶠冢山至江州入江者不入荊州境非禹貢職方之漢水也漢  
志所述導漾舊蹟與漢時沮水源流甚悉水經之沔水卽漢志  
之沮水而所云漾水者其實卽西漢水而亦襲漢志氏道漾水

之文其說非也。郢注則並據西漢水爲釋，固不誤矣。今漢水源出陝西甯羌州北嶓冢山，至沔縣青陽鋪有沔水，會沮水來，會經褒城縣境，稱爲沔水。至湖北漢陽府城北入大江，曰漢口。漢隴西氐道西縣並在甘肅鞏昌府西，和縣境甯羌州之嶓冢山，非禹貢漢志之嶓冢山也。蓋今漢源與古絕異，惟入江之處尙與古同耳。胡渭云：禹貢導水漢至大別入江，而爾雅曰：漢南曰荊州，蓋漢水之名至大別山而止。其曰漢南者，謂大別以西漢水之南也。曰江南者，謂大別以東江水之南也。荊揚之界當於此分。案胡說是也。云其利丹銀齒革者，禹貢荊州厥貢羽毛齒革，惟金三品，礪砥砮丹。僞孔傳云：丹朱。類說文：丹部云：丹巴越之赤石也。案丹卽丹沙也。史記貨殖傳云：江南出金錫連丹沙。

犀齒革爾雅釋器云白金謂之銀賈疏云案禹貢荆揚二州俱云貢金三品則二州通有金錫也 注云衡山在湘南者漢地理志云長沙國湘南禹貢衡山在東南荊州山爾雅釋山云江南衡郭注云南嶽衡山水經禹貢山水澤地所在云衡山在長沙湘南縣南案漢湘南故城在今湖南長沙府湘潭縣西百六十里衡山在今衡州府衡山縣西北三十里亦漢湘南地也云雲蒼在華容者漢地理志敘述此經亦作夢志云南郡華容雲夢澤在南荊州藪爾雅釋地十藪云楚有雲夢郭注云今南郡華容縣東南巴丘湖是也風俗通義山澤篇云九藪荊州曰雲夢在華容縣南今有雲夢長掌之說文艸部云九州之藪荊州雲夢字並與周書同水經禹貢山水澤地所在云雲夢澤在華



容縣之東又夏水篇酈注云夏水又東逕監利縣南縣土卑下澤多陂池西南自州陵東界逕于雲杜沌陽爲雲夢之藪矣韋昭曰雲夢在華容縣案春秋魯昭公三年鄭伯如楚子產備田具以田江南之夢郭景純言華容縣東南巴丘湖是也杜預云枝江縣安陸縣有雲夢蓋跨川互隰兼苞勢廣矣案禹貢荊州雲土夢作乂國語楚語王孫圉曰楚又有藪曰雲連徒州金木竹箭之所生也韋注云楚有雲夢藪澤也左昭二年傳王以田江南之夢杜注云楚之雲夢跨江南北又定四年傳楚子涉雒濟江入于雲中孔疏云土地名云南郡枝江縣西有雲夢城江夏安陸縣東南亦有夢城或曰南郡華容縣東南有巴丘湖昭三年王與鄭伯田於江南之夢諸此也言江南之夢則江北亦

有夢矣司馬相如子虛賦云雲夢者方八九百里則此澤跨江  
南北案孔詵是也楚辭招魂篇云與王趨夢兮課後先王注云  
夢澤中也楚人名澤爲夢中淮南子墜形訓云南方曰大夢高  
注云夢雲夢也據此諸文則雲者此澤之專名夢者楚人之通  
語禹貢之雲土卽楚語之雲連徒州漢地理志江夏郡又有雲  
杜縣土徒杜並聲近字通然則雲土卽澤名雲土夢猶云雲土  
澤耳省文曰雲夢復省之則曰雲曰夢實一藪也史記夏本紀  
索隱以雲土夢爲二澤誤漢華容故城在今湖北荊州府監利  
縣東五里胡渭云漢志南郡華容縣雲夢澤在南荊州藪編縣有  
雲夢宮江夏西陵縣有雲夢宮華容今監利石首二縣監利在江  
北石首在江南編縣今荊門州西陵今蘄州及黃岡麻城皆在江

北水經沔水注云雲杜縣東北有雲夢城雲杜今京山縣又夏水注云自州陵東界逕於雲杜沔陽爲雲夢之藪州陵今沔陽州沔陽今漢陽縣也元和志云雲夢澤在安陸縣南五十里東南接雲夢縣界以上諸州縣皆在江北由是言之東抵蘄州西抵枝江京山以南青草以北皆爲雲夢案胡說甚藪雲夢一澤水則潞爲洞庭郭景純云巴丘湖是也至於全藪陸地則直跨今湖北漢陽黃州安陸德安荊州五府境雖舊蹟湮沒孔胡所說殆近之矣云潁出陽城者漢地理志云潁川郡陽城陽乾山城乾山東入淮豫州浸水經云潁水出潁川陽城縣西北少室山至慎縣入淮酈注云今潁川有三源奇發右水出陽乾山之

潁谷中水導源少室通阜左水山少室南谿案漢陽城廢縣在  
今河南河南府登封縣東南四十里潁水源出登封縣北嵩山  
西南之少室山至安徽正陽關入淮曰潁口云宜屬豫州在此  
非也者鄭意此潁當與豫州之滎互易也說文潁下亦云豫州  
浸漢地理志潁注說同段玉裁云職方荊州浸潁潁豫州浸波  
滎許潁下滎下皆曰豫州浸而滎下曰荊州浸蓋案地形互易  
之也詒讓案潁水下流雖入淮然究在淮北況潁水更在其西  
北數百里斷非淮南所能及故胡渭亦謂潁與潁實皆在河南  
淮北之地若割以屬荊則斗入豫域七八百里非帝王分疆建  
牧之制是也然則潁滎二水當從許鄭說改屬豫州殆無疑矣  
云潁未聞者說文水部云潁水豫州浸許以潁移屬豫州而亦

不詳其所在續漢書郡國志云潁川郡昆陽有湛水水經汝水篇注云湛水出犇縣北魚齒山西北東南歷魚齒山下爲湛浦方五十餘步春秋襄公十六年晉伐楚楚公子格及晉師戰于湛阪楚師敗績遂侵方城之外今水北悉枕翼山阜于父城東南湛水之北山有長阪蓋卽湛水以名阪故有湛阪之名也湛水又東南逕蒲城北京相璠曰昆陽縣北有蒲城蒲城北有湛水者是也湛水又東於汝水九曲北東入汝杜預亦以是水爲湛水矣周禮荊州其浸潁湛鄭玄云未聞蓋偶有不照也今考地則不乖其土言水則有符經文矣案左傳杜注亦云襄陽昆陽縣北有湛水東入汝卽鄺氏所據也賈昌朝易祓黃度顧祖禹胡渭姜兆錫方苞江永吳廷華林喬蔭莊有可朱右曾並同

酈說全祖望云湛是汝水支流而潁亦與汝互相出入之水也  
案湛水出今河南汝州寶豐縣東四十餘里魚齒山東南流至  
南陽府葉縣界又東流至許州襄城縣南入汝其水道尙與古  
同云齒象齒也者禹貢僞孔傳云齒象牙詳壺涿氏疏云革犀  
兕革也者犀兕革中作甲詳函人疏爾雅釋地云南方之美者  
有梁山之犀象馬部晉書據淮南子陸形訓高注說謂梁山卽衡  
山是荆域多犀象故擅齒革之利矣杜子春云湛讀當爲人名  
湛之湛者段玉裁云故書湛字今之沈沒字也杜讀爲人名湛  
之湛者音義當有異不同沈沒說文水部云湛沒也從水甚聲  
一日湛水許不言與湛沒音義有異也詒讓案杜讀爲人名湛  
之湛者疑讀此湛字與卑湛字同也左襄二十九年傳鄭裨謚

周禮正義

禮六十三

三楚學子社本

五百四十九

謹釋文作湛漢書古今人表作卑湛顏注云湛音湛蓋其音與湛沒字異故杜讀從之云湛或爲淮者荆寢不宜與青州川同故鄭不從王引之云淮疑當爲淫字之誤也淫之爲淮猶淫雨之爲淮雨見文心雕龍練字篇又涉下文淮泗而誤也湛與淫古同聲而通用考工記幌氏淫之以蜃杜子春日淫當爲湛宋世罕云說文水部湛古文湛字形近淮俞樾說同案王宋說並通河南曰豫州其山鎮曰華山其澤藪曰圃田其川滎雒其浸波澆其利林漆絲枲其民二男三女其畜宜六擾其穀宜五種華山在華陰圃田在中牟滎兗水也出東垣入于河洸爲滎滎在滎陽波讀爲播禹貢曰滎播既都春秋傳曰楚子除道梁澆營軍臨隨則澆宜屬荊州在此非也林竹木也六擾馬牛羊豕

大雞五種黍稷菽麥稻

**疏**

河南曰豫州者沿禹貢制也釋名釋

州圖云豫州地在九州之中京師東都所居常安豫也爾雅釋文引春秋元命苞云豫之言序也言陽氣分布各得其處故其氣平靜多序也又引李巡云河南其氣著密厥性安舒故曰豫豫舒也案河南者南河之南也禹貢云荆河惟豫州公羊莊十年徐疏引鄭書注云豫州界自荆山而北至河爾雅釋地云河南曰豫州郭注云自南河至漢呂氏春秋有始覽云河漢之間爲豫州周也高注云河在北漢在南故曰之間案周豫州爲王畿所在其方域東距孟諸與青界南抵漢與荆界西依胡渭說抵蟠冢與雍界北距南河與冀界東南依許君說距淮據潁尾與揚界東北距雷夏澤與兗界西南距荆山與荆界西北距華



山與雍界豫居九州之中與揚荆青兗冀雍六州皆接壤惟幽  
隔於青兗并隔於冀不得相接云其川熒雒者唐石經初刻川  
誤水後磨改川熒雒作滎洛釋文作熒洛嘉靖本作滎雒今從  
宋余本岳本建陽本小字本宋注疏本作熒雒段玉裁云熒者  
光不定之兒沛水出沒不常故尙書洸爲熒作此字周禮熒雒  
左傳閔二年宣十二年杜預後序詩鄘風箋熒澤左傳杜注熒  
陽玉篇熒下曰亦熒陽隋書王劭傳上表言符命曰龍鬬於熒  
藏用紀信碑亦作熒陽隋書王劭傳上表言符命曰龍鬬於熒  
陽者熒字三火明火德之盛也然則熒澤熒陽古無作滎者尙  
書禹貢釋文經宋開寶中妄改熒爲滎而經典史記漢書水經  
皆爲淺人任意竄易以爲水名當作滎不知沛水名熒自有本

義於絕小水之義無涉也又云雍州洛水豫州雒水其字分別自古不紊周禮豫州其川樊雒雍州其浸渭洛逸周書職方地理志引職方正同雒不見於詩瞻彼洛矣傳曰洛宗周浸水也此職方氏文也洛不見於左傳傳凡雒字皆作雒如僖七年伊雒之戎宣三年楚子伐陸渾之戎遂至於雒是也淮南墜形訓曰洛出嶽山謂雍州水也雒出熊耳謂豫州水也漢地理志弘農上雒雒水豫州川盧氏伊水鴈池穀水新安澗水河南穀城廛水入雒此謂豫州水也左馮翊襄德北地歸德洛水直路沮水入洛此謂雍州水也皆尙未誤而許書水部下不舉豫州水尤爲二字分別之證後人書豫水作洛其誤起於魏魏志文帝紀裴松之注引魏略曰黃初元年詔以漢火行也火忌水故洛

去水而加佳魏於行次爲土土水之牡也水得土而乃流土得水而柔故除佳加水變雒爲洛此不改雒爲洛而又妄言漢變洛爲雒自魏至今皆受其欺周禮春秋在漢以前誰改之乎案段說是也釋文雒作洛唐石經作滎洛並誤雒者漢地理志云弘農郡上雒禹貢雒水出豳領山東北至鞏入河豫州川水經云洛水出京兆上洛縣瀍山至鞏縣入河案雒水源出今陝西商州雒南縣西豳領山經河南鞏縣至汜水縣入河云其浸波滎者波周書職方作陂同聲段借字云其利林漆絲枲者漢地理志敘述此經林作麻案麻卽枲也不宜鍾復且與注不合疑誤禹貢豫州厥貢漆枲絺紵厥篚織纊枲詳天官敘官疏注云華山在華陰者漢書地理志云京兆尹華陰縣太華山在

南豫州山說文山部云峯嶺山也在弘農華陰華卽嶺之借字  
水經禹貢山水澤地所在云華山爲西嶽在弘農華陰縣西南  
案漢華陰故城在今陝西同州府華陰縣東南五里華山在縣  
南十里云圃田在中牟者爾雅釋地云十藪鄭有圃田郭注云  
今滎陽中牟縣西圃田澤是也詩小雅甫田箋作鄭有甫田漢  
地理志云河南郡中牟圃田澤在西豫州藪風俗通義山澤篇云  
九藪豫州曰圃田在中牟縣西宋本說文艸部云豫州甫田字  
亦作甫水經渠水篇鄭注云渠水厯中牟縣之圃田澤皇武子  
曰鄭之有原圃猶秦之有具囿澤在中牟縣西西限長城東極  
官渡北佩渠水東西四十許里南北三百許里中有沙岡上下  
二十四浦津流逕通淵潭相接元和郡縣志云鄭州中牟縣圃

田澤一名原圃縣西北七里其澤東西五十里南北二十六里  
案漢中牟故城在今河南開封府中牟縣東六里圃田澤在縣  
西北七里云榮堯水也出東垣入于河洸爲榮榮在滎陽者榮  
段玉裁校並改滎阮元黃丕烈亦謂注中榮字皆滎之誤是也  
但釋文經作滎而注榮播字仍作榮宋刻各本亦經注字異或  
鄭於經自從滎於注自從榮若經用古字注用今字之例今亦  
不敢輒改後注榮播同出東垣段校刪東字云地理志郡國志  
皆無東字史記魏世家城王垣徐廣曰垣縣有王屋山然則東  
字曠也或云當作出河東垣職方注例不舉郡名增河字非也  
說文洸水出河南垣王屋山東爲洸各本亦誤作河東東垣案  
段說是也入于河于注例當作於各本並誤漢地理志云河東

郡垣禹貢王屋山山在東北沁水所出東南至武德入河軼出  
滎陽北地中又東至琅槐入海滎陽縣屬河南郡書禹貢導沁  
水東流爲濟入于河溢爲滎史記夏本紀溢作洸鄭本蓋亦作  
洸說文水部充作沁又云涉沁也東入于海洸水所蕩洸也充  
卽沁之隸變涉四澮之一卽兗州川字俗通作濟水經云濟水  
出河東垣縣東王屋山爲沁水又東至溫縣西北爲濟水至鞏  
縣北南入于河與河合流又東過滎陽縣北又東北至礪礪南  
東出過滎澤北至乘氏縣西分爲二其一水東南流其一水從  
縣東北流入鉅野澤過乘氏縣與濮渠合至利縣過甲下邑入  
河又東北入海鄭注說濟水故瀆在溫云濟水當王莽之世川  
瀆枯竭其後水流逕通津渠勢改尋梁脈水不與昔同又引晉

地道志云濟自大伾入河與河水關南決爲滎澤京相璠云滎澤在滎陽縣東南與濟隧合案水經濟水至鞏縣北南入于河卽入河之處至礪磧南東出過滎澤北卽決爲滎之處滎卽沈水所分故鄆以沈水釋滎也漢垣縣故城在今山西絳州垣曲縣西北二十里沈水出縣東北百里王屋山漢滎陽故城在今河南鄆州滎澤縣南十七里滎澤在縣治南濟水故瀆自王莽以後絕續遷徙禹蹟久湮卽班志桑經所載水道今亦沒於大小清河不復可辨識至風俗通義山澤篇說四瀆云濟出常山房于贊皇山東入泚此因漢時泚瀆字通作濟應氏遂誤以濟當泚則酈道元已廢其謬矣滎澤縣今屬開封府澤東漢時已塞爲平地詳後云波讀爲播禹貢曰滎播旣都者釋文云都本

或作豬案今本禹貢作滎波既豬僞孔傳云滎澤波水已成遏  
豬孔疏云馬鄭王本皆作滎播謂此澤名滎播案史記夏本紀  
亦作滎播既都鄭本禹貢當作滎播故此注卽據書讀波爲播  
僞孔本滎亦誤滎播作波者蓋依周禮轉改禹貢矣詩鄘風定  
之方中孔疏引鄭書注云洸水溢出河爲澤今塞爲平地滎陽  
民猶謂其處爲滎澤在其縣東春秋魯閔公二年衛侯及狄人  
戰于滎澤此其地也史記集解引書注滎澤作滎播又書釋文  
引馬融書注云滎播澤名說文水部云播水在河南滎陽水經  
濟水注云閼闕曰滎嶠澤名也故呂忱曰嶠水在滎陽謂是水  
也案嶠疑當作潘呂忱字林多本說文也蓋禹貢此文馬鄭王  
本並作滎播謂卽滎澤僞孔本作滎波而釋以滎澤波水許闕



呂並作滎潘而以潘爲別一水與馬鄭王孔字義並殊異鄭此注旣以滎澤釋滎雒又引滎播釋波滎則似亦以滎播爲二殆猶具區之與五湖水澤相屬二而一者與今播水無攷水經滎水注云滎水又與波水合水出霍陽西川大嶺東谷俗謂之歇馬嶺卽應劭所謂孤山波水所出也馬融廣成頌曰浸以波滎其水又南逕蠻城下又南分三川于白亭東而俱南入滎水滎水自下兼波水之通稱也是故關騶有東北至定陵入汝之文案後漢書馬融傳李注引水經注以釋波滎又云今在汝州魯山西北通典州郡說同胡渭云汝州今屬河南州西四十里廣成澤一名黃陂周百里有灌溉之利後漢於其地置廣成苑澤水出狼臯山東南流合溢泉水波水自西來注之又東南合滎

水入汝此卽波漾之波也馬融精於周官其頌廣成明言浸以波漾鄭違其義非是禹貢滎波自當作播職方之波漾當讀如字不可牽合案胡說是也酈道元李賢杜佑咸據馬義以波卽波水其說甚塙黃度顧祖禹林喬蔭朱右曾並從其說全祖望云康成師古皆不知波水所在而以滎波之波當之不知滎雒旣爲川矣不應復以其支流爲浸波水自當以出霍陽由滙入汝之波爲是案金說足申酈義波水入滙之後滙水亦兼波水之稱其下流甚遠宜爲一州之浸此經之漾許鄭謂當屬荊州固塙不可易實則波亦當屬荊州與潁湛互易蓋波與湛雖同入汝而波自在湛南繫之荊域亦尙可通也引春秋傳曰楚子除道梁漾營軍臨隨者左莊四年傳云楚武王伐隨王卒令尹

鬪祗莫敖屈重除道梁澁營軍臨隨隨人懼行成引以證澁卽  
彼澁水也彼杜注云澁水在義陽厥縣西東南入鄖水梁橋也  
孔疏云釋例曰義陽厥縣西有涑水源出縣北從縣西東南至  
隨縣入鄖水杜以涑解澁蓋聲相近而字轉耳水經鄖水篇注  
云澁水出隨縣西北黃山南逕潁西縣西又東南潁水入焉又  
東南逕隨縣故城西又南流注於潁案澁水出今湖北隨州西  
北界山南流有潁水來會又會德安府雲夢應城數縣水至漢  
川縣潁口塘南入漢源流長五百餘里胡渭云澁水流短潁水  
出蔡陽縣大洪山東南逕隨縣至安陸入於沔澁旣合潁自下  
可以通稱經所謂澁蓋卽潁也云則澁宜屬荊州在此非也者  
鄭意左傳之澁在漢東以地望定之當屬荊州其豫州浸之類

又當屬此二水宜互易也漢地理志顏注說同說文水部云澁水在漢南荊州浸也段玉裁云職方荊州浸潁澁豫州浸波澁許書於澁曰豫浸於澁曰荊浸蓋正經文之誤與鄭說澁正同也詒讓案說文水部以澁亦爲豫州浸則二水並當互易然則許意此波澁皆宜爲荊浸不僅如鄭說以潁澁互易矣但許書波字說解不云荊浸不知以何水當之也云林竹木也者地官敘官林衡注云竹木生平地曰林云六擾馬牛羊豕犬雞者周書職方孔注云家所畜曰擾漢地理志顏注云謂之擾者言人所馴養也賈疏云此與爾雅六畜及周禮六牲一也案六牲詳膳夫牧人注云五種黍稷菽麥稻者後并州及月令五種注並同周書孔注亦從鄭說賈疏云此州東與青州相接青州有稻

麥西與雍州接雍州有黍稷故知有此四種但此九州不言麻  
與菽及苽鄭必知取菽者蓋以當時目驗而知故添爲五種也  
程瑤田云鄭注疾醫職之五穀曰麻黍稷麥豆據月令之文其  
注職方氏宜五種曰稻黍稷麥菽不據月令者以本經他州所  
見有稻黍稷麥四種四種有稻而月令五穀無稻不得易本經  
而就月令故據所已見之四種而益之以菽案程說深得鄭指  
漢書食貨志云種穀必雜五種顏注云卽五穀謂黍稷麻麥豆  
也顏卽據月令與此注義不同也豫州爲周東都雒邑王畿所  
在大司徒所謂地中故六擾五種無不宜淮南子墜形訓云平  
土之人慧而宜五穀大戴禮記千乘篇云是故立民之居必於  
中國之休地因寒暑之利六畜育焉五穀宜焉與此經義合正

東曰青州其山鎮曰沂山其澤藪曰望諸其川淮泗其浸沂流其利蒲魚其民二男二女其畜宜雞狗其穀宜稻麥沂山沂水所出也在蓋望諸明都也在睢陽流出東莞二男二女數等似誤也蓋當與兗州同一男二女鄭司農云淮或爲睢流或爲洙

**疏**正東曰青州者沿禹貢制而置城則異釋名釋州國云青州在東取物生而青也爾雅釋文引太康地記云青州東方少陽其色青其氣清歲之首事之始故以青爲名焉說文丹部云青東方色也禹貢云海岱惟青州僞孔傳云東北據海西南距岱史記夏本紀集解引鄭書注云東自海西至岱呂氏春秋有始覽云東方爲青州齊也案周青州方域東至海南據淮與揚界西據孟諸與豫界北距岱與兗界東南亦據淮東北依漢志說

距淮與兗界西南至桐柏與豫界西北距沛水與兗界云其川  
淮泗者漢地理志云南陽郡平氏禹貢桐柏大復山在東南淮  
太所出東南至淮陵入海青州川說文水部云淮水出南陽平  
氏桐柏大復山東南入海水經云淮水出南陽平氏縣胎簪山  
至廣陵淮浦縣入于海案淮水出今河南南陽府桐柏縣西南  
桐柏山至江蘇淮安府安東縣雲梯關入海泗者漢地理志云  
濟陰郡乘氏泗水東南至睢陵入淮又魯國卞泗水西南至方  
輿入沛青州川說文水部云泗水受沛水東入淮水經云泗水  
出魯卞縣北山過下邳縣西東南入於淮案泗水出今山東泗  
水縣東陪尾山至兗州府入運河漢志泗水兩見者卞縣泗水  
入沛東以後至乘氏復出也其入淮故道今爲河所奪非漢志

之舊矣禹貢淮泗沂並在徐州者後注謂周青州則禹貢徐州地是也云其利蒲魚者詩王風揚之水箋云蒲蒲柳孔疏引陸機疏云蒲柳有兩種皮正青者曰小楊共一種皮紅者曰大楊其葉皆長廣於柳葉皆可以爲箭幹故春秋傳曰董澤之蒲可勝既乎今又以爲箕鐘之楊也案此蒲卽蒲柳也與司几筵蒲筵之蒲爲水艸異魚海魚也禹貢青州厥貢海物維錯史記夏本紀集解引鄭書注云海物海魚也云其畜宜雞狗者狗周書職方作犬義同注云沂山沂水所出也在蓋者漢地理志云泰山郡蓋沂水南至下邳入泗青州寔說文水部云沂水出東海費東西入泗一日沂水出泰山蓋青州浸水經云沂水出泰山蓋縣艾山至下邳縣入泗鄭注云水有二源南源所導世謂



周禮正義

禮六十三

三

五百四十八

之柞泉北水所發俗謂之魚窮泉俱東南流合成一川案沂山在今山東沂州府沂水縣北百十里沂水今名沂河出縣西北百七十里雕崖山至江蘇邳州人運河漢蓋縣故城在沂水縣西北七十里鄭說本漢志水經及說文後說並同段玉裁云鄭許說乖異者蓋沂山卽東泰山是山盤回數縣今沂水出沂水縣之雕崖山卽沂山西峯也賈疏云案禹貢云海岱及淮惟徐州又云淮沂其乂注云淮沂二水名不在青州者周公以禹貢徐州地爲青故也云望諸明都也在睢陽者賈疏云案禹貢云導菏澤被明都彼禹貢無望諸故從明都案春秋朱藪澤有孟諸明都卽宋之孟諸者也案今書云被子孟豬僞孔傳云孟豬澤名在河東北詩陳謚孔疏引書作盟豬史記夏本紀作明都據賈

疏疑鄭本禹貢亦作明都矣漢地理志云梁國睢陽禹貢盟諸澤在東北志敘述此經則作孟諸爾雅釋地十藪宋有孟諸郭注云今在梁國睢陽縣東北風俗通義山澤篇云九藪青州曰孟諸說文艸部亦云青州孟諸水經禹貢山水澤地所在云明都澤在梁郡睢陽縣東北案望諸鄭釋爲明都史記水經同書作孟豬或作盟豬漢志作盟諸爾雅作孟諸左僖二十八年傳及墨子兼愛中篇呂氏春秋有始覽說文風俗通義並同鄭詩譜陳譜作明豬孟望明盟及諸都豬聲類並相近禹貢孟豬在豫州周改入青州元和郡縣志云宋州虞城縣孟豬澤在縣西北十里周迴五十里俗號盟諸澤案漢睢陽故城在今河南歸德府商邱縣孟諸澤在府東北接虞城縣界云流出東莞者漢

地理志云琅邪郡東莞術水南至下邳入泗青州度顏注云術水卽流水也說文水部云沔水青州沔水經云流水出琅邪東莞縣西北山至陽都縣入沂屬注云出大弁山舊瀆入睢陽宿預縣注泗水地理志所謂至下邳注泗者也經言於陽都入沂非矣案漢東莞故城在今山東沂州沂水縣治西北流水今名流河出沂水縣西北五十里大弁山至江蘇流陽縣境分爲二派入於海不入泗亦不入沂與漢志水經並異云二男二女數等似誤也蓋當與兗州同一男三女者漢地理志敘及周書職方正作二男三女與鄭所定合段玉裁云鄭謂數等誤者天地化育之道其數必不能正等也知當與兗州同者蓋竟相接二與二字易誤也俞樾云男女相等當云一男一女不當云二男

二女其誤明矣鄭司農云淮或爲睢者段玉裁云睢與淮形聲皆相近徐養原云漢書地理志陳留浚儀睢水首受狼湯水東至取慮入泗攷漢之陳留在職方亦爲豫州之境而取慮屬臨淮已入職方青州界以此爲青州川固無不可然淮爲四瀆之一睢水源流雖長豈能與淮敵青州之川斷無舍淮而數睢之理故知爲字之誤云流或爲洙者段玉裁云洙與流部分不同而聲相近如公叔戌世本作朱檀弓作尤鄭云尤當爲朱也今本檀弓作木蓋誤詒讓案漢地理志云泰山郡蓋臨樂于山洙水所出西北至蓋入池水說文水部云洙水出泰山蓋臨樂山北入泗班許皆不云青州浸或本非是河東曰兗州其山鎮曰岱山其澤藪曰大野其川河洸其浸盧維其利蒲魚其民二男

三女其畜宜六擾其穀宜四種岱山在博大野在鉅野廬維當  
爲雷雍字之誤也禹貢曰雷夏既澤雍沮會同雷夏在城陽四  
種黍稷稻麥疏河東曰兗州者沿禹貢制也兗正字當作沘釋  
名釋州國云兗州取兗水以爲名也藝文類聚州部引春秋元  
命苞云兗之言端也信也蓋取兗水以爲名焉爾雅釋文引李  
巡云濟河間其氣專質厥性信謹故曰兗兗信也案春秋緯及  
釋名云取水爲名是也說文口部釋沘州云九州之滬地也故  
以沘名焉亦與維義相近沘水卽沛水沛俗通作濟攷工記總  
敘亦作濟詳前豫州樊雒疏禹貢云濟河惟兗州史記夏本紀  
作沘州書僞孔傳云東南據濟西北距河爾雅釋地云濟河同  
曰兗州郭注云自河東至濟呂氏春秋有始覽云河濟之間爲

兗州衛也高注云河出其北濟經其南案周兗州方域東至海  
南據岱與青界西距東河與冀界北距九河與幽界東南依漢  
志說據濰與幽界東北亦至海西南據雷夏與豫界西北距東河  
與冀界河東者東河之東也東河之西爲冀州云其川河涉者  
書禹貢兗州云九河既道僞孔傳云河水合爲九道在此州界  
平原以北是又導河積石至于龍門南至于華陰東至于砥柱  
又東至于孟津東過洛汭至于大伾北過洺水至于大陸又北  
播爲九河同爲逆河入于海漢地理志云金城郡河關縣河水  
行塞外東北入塞內至章武入海說文水部云河水出敦煌塞  
外昆侖山發源注海水經云崑崙虛在西北河水出其東北陬  
又南出慈頌山其一源出于閭國南山北流與慈嶺河合東注

蒲昌海又東入塞過黎陽縣南河之故瀆出焉至利縣甲下邑東北入于海案禹治河故道自積石西來至今鄠爾多斯左翼後旗唐東受降城折而南流入職方雍冀二州境禹貢王制所謂西河也至今陝西潼關廳漢華陰縣境折而東流入職方豫州境禹貢王制所謂南河也過大伾山南至今河南衛輝府濬縣漢黎陽縣衙胥口又折而東北流合漳水至今直隸永平府樂亭縣碣石入海王制所謂東河也西周之世並同禹蹟至定王河徙之後黎陽以上猶禹貢故道自大伾以下舊蹟湮廢河不復自碣石入海至漢王莽時東河又改道與周定王時復不同故漢志謂之故大河卽周定王時河也其由章武入海則仍東周舊迹章武在今直隸天津府天津縣境水經河水上流亦

與古同其黎陽以下別著故漬助漢志所謂故大河也其自利縣入海者則東漢後下流改道又與班志不同利縣在今山東青州府博興縣境唐宋以後河流遷徙尤不常 國朝道光以前大河至江蘇淮安府安東縣入海咸豐開河又北徙自山東武定府利津縣大清河入海與水經利縣入海之道相近此古今河道之略也 注云岱山在博者漢地理志泰山郡博縣有泰山廟岱山在西北白虎通義封禪篇云嶽東方爲岱宗者何言萬物更相代於東方也風俗通義山澤篇云泰山尊曰岱宗岱者長也萬物之始陰陽交代爲五嶽之長水經禹貢山水澤地所在篇云泰山爲東嶽在泰山博縣西北案漢博縣故城在今山東泰安府泰安縣東南三十里泰山在縣北五里禹貢岱



在青州周改入兗云大野在鉅野者漢地理志云山陽郡鉅野  
大埜澤在北兗州藪志敘述此文又作泰埜案鉅大義同埜野  
古今字爾雅釋地十藪云魯有大野郭注云今高平鉅野縣東  
北大澤是也風俗通義山澤篇云九藪兗州曰大野在鉅野縣  
北史記夏本紀集解引鄭書注云大野在山陽鉅野北名鉅野  
澤水經濟水篇云濟水又東至乘氏縣西分爲二其一水從縣  
東北流入鉅野澤酈注云何承天曰鉅野湖澤廣大南通洙泗  
北連清濟舊縣故城正在澤中城之所在則鉅野澤也衍東北  
出爲大野矣元和郡縣志云鄆州鉅野縣大野澤在縣東五里  
一名鉅野南北三百里東西百餘里案今山東曹州府鉅野縣  
卽漢故縣鉅野澤在縣東五里元末爲河所決今洄爲平陸禹

貢大野在徐州周無徐州故入兗州云盧維當爲雷雍字之誤也者胡渭云周禮多古字靈似盧雖似維以字形相近而誤案胡說是也此盧維鄭破爲雷雍漢書地理志敘則作盧維志又云琅邪郡箕侯國禹貢維水北至都昌入海兗州浸也案維卽濰書釋文亦云濰又作維同聲段借字也依班說則此經之維卽濰水說文水部云濰水出琅邪箕屋山東入海徐州浸夏書曰濰濰其道案徐州浸當作兗州浸許蓋亦從班說不破字通與州郡及易破黃度顧祖禹姜兆錫李光坡方苞莊有可林喬蔭說並從之水經云濰水出琅邪箕縣濰山至都昌縣入海今濰水俗曰淮河源出山東莒州北境之箕屋山至萊州府昌邑縣東北入海曰淮河口盧水漢志敘述此經同而不著其說頗

注則云盧水在濟北盧縣鄭康成讀曰雷非也則顏讀盧亦如  
字攷漢志云泰山郡盧縣濟北王都此卽顏所謂濟北盧縣其  
地唐屬濟陽郡故通典釋此盧維云盧水在濟陽郡盧縣是杜  
亦從顏說也呂飛鵬云盧維二水名維卽禹貢維溝其道之維  
水經云維水出琅邪箕縣維水東北過東武縣西注云維水又  
北右合盧水卽久台水也地理志曰水出瑯邪橫縣故山山在  
東武縣故城東南世謂之盧山也西北流逕昌縣故城西東北  
流齊地記曰東武城東南有盧水其水又東北流逕東武縣故  
城東而西北入維班志瑯邪郡橫下云故山久台水所出東南  
至東武入淮淮卽維之省則盧維二水木合也維溝在禹貢屬  
青州而周之兗州實侵夏青州之地故山鎮曰岱山康成破盧

維字爲雷雍引禹貢以證之蓋見禹貢兗州之域無盧維故也  
案呂說本黃度趙一清是也漢志有二盧水又有二盧縣水經  
亦有二盧水漢志遼西郡肥如有盧水東入玄水又中山國北  
平有盧水至高陽入河並不云兗州浸至漢志泰山郡盧縣此  
師古云盧水所在也然志不云有此水又瑯邪郡橫縣久合水  
此水經濰水注所謂盧水也然志雖有其水而不云名盧又漢  
志城陽國有盧縣水經沂水注云盧川水出鹿嶺山東南流逕  
城陽之盧縣故蓋縣之盧上里也又東南注于桑泉水據鄒說  
則今本漢志盧乃盧之誤蓋以水名縣也顧祖禹云山東濟南  
府長清縣盧城在縣西南二十五里案此卽漢濟北之盧縣其  
地跨今泰安府平陰縣境境內並無盧水則顏說殆不足據綜

校班志桑經肥如之盧水在今直隸灤平縣北境於周當屬幽州北平之盧水在今直隸滿城縣境於周當屬并州城陽之盧川水在沂沭二水之間於周又當屬青州是皆不得爲兗浸惟入濰之久台水於兗爲近故黃趙呂並以此爲兗浸之盧其水今出山東青州府諸城縣東北三十里廬山北流經縣東北二十五里入於濰水以水道校之盧本入濰經或以二水並舉於義可通周兗州東逾洙跨岱及大野皆禹貢徐青地故濰於禹貢雖屬青州而以周輿地論之其下流入海之處大半屬幽州其上流則與岱宗東西相去不過三百里以之隸兗未爲踰越若周青州則北界距岱但能有沂泗不得及濰與禹貢之青疆域絕異也引禹貢曰雷夏旣澤雍沮會同者禹貢兗州文欲證

經雷卽彼雷夏雍卽彼雍也今書雍誤作濫案雍卽隸變  
與濫別史記夏本紀及漢地理志並作雍與鄭同僞孔傳云雷  
夏澤名濫沮二水會同此澤史記集解引鄭書注云雍水沮水  
相觸而合入此澤中張氏正義引括地志云雍沮二水在雷澤  
西北平地也元和郡縣志說同胡渭云二水合以注澤則言雍  
固可該沮也案雍沮今無其水水經瓠子河注以禹貢之雍卽  
瓠子河又卽說文水部之濫不知禹貢雍沮並入雷澤不與河  
通今山東曹州又有濫河則又五代以後決河之分流皆非古  
雍水也云雷夏在城陽者漢地理志云濟陰郡成陽禹貢雷澤  
在西北水經禹貢山水澤地所在云雷澤在濟陰成陽縣西北  
又瓠子水篇鄭注云瓠子河又左逕雷澤北其澤藪在大成陽

縣故城西北一十餘里其陂東西二十餘里南北一十五里卽  
舜所漁也案城陽卽成陽漢城陽故城在今山東曹州東北六  
十里雷澤在成陽故城西北濮州東南境今涸云四種黍稷稻  
麥者周書孔注同賈疏云以其東與青州相接青州有稻麥西  
與冀州相接冀州有黍稷故知也正西曰雍州其山鎮曰嶽山  
其澤藪曰弦蒲其川涇汭其浸渭洛其利玉石其民三男二女  
其畜宜牛馬其穀宜黍稷嶽吳嶽也及弦蒲在汧涇在涇陽汭  
在鹵地詩大雅公劉曰汭坂之卽洛出懷德鄭司農云弦或爲  
汧蒲或爲浦疏正西曰雍州者沿禹貢制也御覽州郡部引春  
秋元命苞云雍壅也釋名釋州國云雍州在四山之內雍翳也  
爾雅釋文引李巡云河西其氣鬱雍厥性急凶故曰雍雍壅也

又引太康地記云雍州兼得梁州之地西北之位陽所不及陰氣壅閼故取名焉禹貢云黑水西河惟雍州爾雅釋地云河西曰離州雍卽離之隸變公羊莊十年徐疏引鄭書注云雍州界自黑水而東至西河也呂氏春秋有始覽云西方爲雍州秦也案周雍州方域東距西河與冀界南據渭與豫界西界西北界北狄並荒服不知所極東南距華陰與豫界東北亦距西河西南依胡濇說逾嶓冢與荆界西北亦戎狄荒服東南北三方與禹貢略同惟黑水於周代經籍無所見疑淪於戎狄則西境蹙矣詳後云其山鎮曰嶽山者王引之云嶽下山字涉上下文而衍爾雅釋山釋文漢書郊祀志注後漢書明帝紀注引此皆無山字自唐石經始衍山字而各本遂沿其誤據鄭注云嶽吳



嶽也則本無山字可知或說注省去山字非也注云會稽醫無  
閭下皆無山字以經文本無故也其衡華沂岱霍恆下皆有山  
字以經文本有故也此云嶽吳嶽也則經文本無山字而非鄭  
之省文明矣周書職方篇有山字亦後人依俗本周禮加之據  
孔注云華山西嶽也嶽吳嶽也則亦無山字可知案王說是也  
云其澤藪曰苙蒲其川涇汭者周書職方苙蒲作疆蒲涇汭作  
涇納字並通云其浸渭洛者禹貢云道渭自鳥鼠同穴入于河  
漢地理志云隴西郡首陽禹貢鳥鼠同穴山在西南渭水所出  
東至船司空入河雍州浸說文水部云渭水出隴西首陽渭首  
亭南谷東南入河杜林說夏書以爲出鳥鼠山隴州浸也水經  
渭水篇云渭水出隴西首陽縣渭谷亭南鳥鼠山過華陰縣北

又東入于河案渭水出今甘肅渭源縣西青雀山卽鳥鼠同穴山經陝西華陰縣東北入河曰渭口卽古渭汭地也禹貢渭屬梁州者賈後疏謂周合梁於雍是也云其利玉石者謂多玉及美石也禹貢雍州厥貢維球琳琅玕孔傳云球琳皆玉名琅玕石而似玉詩大雅釋文引鄭書注云璆美玉琳美石琅玕珠也史記貨殖傳云山西饒玉石賈疏云藍田見有玉山出玉石以爲利者也云其穀宜黍稷者淮南子墜形訓云渭水多力而宜黍注云嶽吳嶽也者爾雅釋地云河西嶽郭注云吳嶽漢地理志云右扶風汧吳山在西古文以爲汧山雍州山案禹貢導嶰及岐字作嶰書釋文引馬本作開故水經禹貢山水澤地所在篇云開山在扶風汧縣之西也又渭水篇酈注云汧水又

東會一水發南山南側俗以此名吳山地理志曰吳山古文以爲汧山也國語所謂虞矣據此諸文是嶽山一名吳山又名汧山或曰吳嶽吳或作虞汧或作峽開實一山也史記封禪書自華以西名山七曰華山薄山岳山岐山吳岳鵠冢瀆山漢書郊祀志吳岳作吳山顏注云周禮職方氏雍州其山曰嶽爾雅亦云河西曰嶽說者咸云嶽卽吳嶽也今志有嶽又有吳山則吳嶽非一山之名但未詳嶽之所在耳徐廣云嶽山在武功據地理志武功但有垂山無嶽山也吳山在今隴州吳山縣胡渭云吳嶽班固皆謂卽古之岍山然史記封禪書又析吳嶽與嶽山而爲二隴州志則以州西四十里之吳山爲岍山州南八十里之嶽山爲吳嶽諸說互異未知孰是竊謂吳山漢志雖云在縣

西而岡巒綿互延及其南與嶽山只是一山自周尊岍山曰嶽  
山俗又謂之吳山或又合稱吳嶽史記遂析嶽山與吳嶽爲二  
山而岍山之名遂隱其實此二山者周禮總謂之嶽山禹貢總  
謂之岍山當以漢志爲正案胡說是也嶽山卽禹貢之岍山周  
以爲西都之嶽詩大雅崧高孔疏引鄭志云周都豐鎬故以吳  
嶽爲西嶽金鶚謂當爲中嶽其說近是詳大司樂疏漢汧縣故  
城在今陝西鳳翔府隴州南三里嶽山在州西四十里云及茲  
蒲在汧者明嶽與弦蒲同在汧也漢地理志云右扶風汧北有  
蒲谷鄉弦中谷雍州弦蒲戴汧水出西北入渭風俗通義山澤  
篇云九藪雍州曰弦蒲在汧縣北蒲谷亭說文艸部云隄州弦  
圃字別作圃水經渭水篇注云汧水出汧縣之蒲谷鄉弦中谷

周禮正義 禮六十三

罕三楚學社本

五百四十九

決爲弦蒲數案弦蒲數亦在今隴州西四十里蒲谷鎮云涇出  
涇陽者漢地理志云安定郡涇陽開頭山在西禹貢涇水所出  
東南至陽陵入渭雍州川說文水部云涇水出安定涇陽開頭  
山東南入渭隴州之川也案漢涇陽故城在今甘肅平涼府平  
涼縣西南涇河出縣西四十里并頭山東南麓至陝西西安府  
高陵縣西南上馬渡入渭曰涇口云汭在鹵地者漢地理志云  
右扶風枸邑有鹵鄉詩鹵國公劉所邑案汭水源不出鹵地鄭  
云在彼者據詩而言引詩大雅公劉曰汭坻之卽者證汭水在  
鹵地也毛詩作芮鞫之卽詩釋文云芮本又作汭毛傳云芮水  
厓也鞫究也鄭箋云芮之言內也水之內曰隩水之外曰鞫案  
毛詩不以芮爲水名鄭亦從之與此注文義並異漢地理志云

右扶風汧水出西北東入涇詩芮隄雍州川也顏注云隄讀與鞠同詩芮鞠之卽韓詩作芮隄鄭此注卽據韓班義也坻隄鞠字並通廣雅釋上云坻隄也案汧水出今平涼府華亭縣西隴山東麓至崇信縣入涇云洛出懷德者漢地理志云左馮翊裏德洛水東南入渭雍州寢顏注云裏亦懷字志又云北地郡歸德洛水出北蠻夷中入河說文水部云洛水出左馮翊歸德北夷界中東南入渭段玉裁云左馮翊當作北地漢志北地歸德洛水入河入河者入渭以入河也此總舉其源委也左馮翊裏德洛水入渭此言其入渭之處也案段說是也蓋洛水本出歸德至懷德而入渭懷德非其所出之處鄭蓋忘漢志別有洛出歸德之文遂誤以爲出懷德但亦偶有不照也洛水禹貢謂

之漆沮僞孔傳云漆沮亦曰洛水出馮翊北水經渭水注云渭水東過華陰縣北洛水入焉闕駟以爲漆沮之水是也淮南子墜形訓云睢出荆山高注云荆山禹貢北條荆山在左馮翊懷德縣縣南有荆梁原雒州浸也案淮南書之睢當卽沮之借字蓋沮水入洛洛亦通稱沮故高以睢爲雍浸矣漢懷德故城在今陝西同州府朝邑縣西南三十里漢歸德故城在今慶陽府合水縣東北百里洛水卽古漆沮出今甘肅慶陽府安化縣北境三百餘里之白於山經中部縣東沮水來入亦稱沮水又過耀州合漆水至朝邑縣入河舊至華陰縣入渭東至渭口入河自明時改流不南入渭今洛口南去渭口三十里豫州雒水字亦作洛與此異詳前疏鄭司農云弦或爲汧蒲或爲浦者弦蒲

藪卽汧水旁地汧弦音亦相近徐養原云水經注汧水決爲弦  
蒲藪爾雅曰水決之澤爲汧汧之爲名實兼斯義蒲者蒲之省  
文也說文艸部藪字注作弦圃圃與蒲古字通



周禮正義卷六十三終